

Na osnovu člana 15 Zakona o advokaturi-odvjetništvu Federacije Bosne i Hercegovine(Sl.list FBiH br.40/02, 29/03,18/05 i 68/05) i člana 13 stav 3 Statuta Regionalne advokatske-odvjetničke komore Sarajevo (prečišćeni tekst), Skupština Regionalne advokatske –odvjetničke komore Sarajevo,održana dana 10.4.2010 godine, usvojila je

POSLOVNIK O RADU SKUPŠTINE REGIONALNE ADVOKATSKE-ODVJETNIČKE KOMORE SARAJEVO

Član 1.

Ovim Poslovníkom uređuju se pravila rada svih oblika Skupštine Regionalne advokatske komore Sarajevo (u daljnjem tekstu: Skupština),na osnovu Zakona o advokaturi-odvjetništvu,odredaba Statuta advokatske –odvjetničke komore FBiH i Statuta Regionalne advokatske-odvjetničke komore Sarajevo (U daljnjem tekstu:Komora).

Poslovníkom se uređuju pravila rada Skupštine koja nisu bliže uređena Zakonom ili Statutom,kao što su: sastav Skupštine,sazivanje svih oblika Skupštine,otvaranje,rad,izbor i opoziv organa Komore,donošenje odluka,prava,dužnosti te druge odredbe o radu Skupštine.

OSNOVNE ODREDBE

Član 2

Skupštinu Regionalne komore čine svi advokati sa područja Regionalne komore, tri advokatska stručna saradnika koje delegira Organizacija advokatskih stručnih saradnika, ako su se udružili u svoju organizaciju i tri advokatska pripravnika koje delegira Organizacija advokatskih pripravnika.

Skupština Komore, po svom karakteru može biti izborna, redovna i vanredna.

Izborna Skupština održava se svake četiri (4) godine, a vrijeme njenog održavanja određuje se najmanje osam (8) dana prije isteka mandata organa Komore i delegata u Advokatskoj komori FBiH izabranih od strane prethodno održane izborne skupštine.

Redovna Skupština Komore održava se jednom godišnje i to najkasnije u roku od trideset (30) dana po proteku godine dana od datuma održavanja prethodne Skupštine.

Izbornu i redovnu Skupštinu saziva predsjednik Komore slanjem obavijesti svim članovima Komore, najkasnije 15 dana prije njenog održavanja.

Vanredna Skupština održava se po potrebi, na obrazloženi zahtjev Upravnog odbora ili 1/3 članova Komore, a saziva je Predsjednik Komore najkasnije u roku od trideset

(30) od dana prijema zahtjeva. Obavjest o sazivanju vanredne Skupštine objavljuje se najkasnije sedam (7) dana prije njenog održavanja.

Svaka redovna ili vanredna Skupština po svom sadržaju može biti i djelimično izborna u slučaju isteka mandata, ostavke ili prestanka vršenja izborne funkcije u organima Komore ili funkcije Delegata u Advokatskoj komori FBiH.

OTVARANJE SKUPŠTINE

Član 3.

Skupštinu otvara i njenim radom, rukovodi predsjednik Komore, a u slučaju njegove odsutnosti, jedan od potpredsjednika ili osoba koju odredi Upravni odbor Komore.

Nakon otvaranja Skupštine, predsjednik Komore ili osoba koja ga zamjenjuje, utvrđuje broj prisutnih članova Skupštine. Ukoliko Skupštini nije prisutan Statutom predviđeni broj članova Skupštine (polovina više jedan od ukupnog broja članova Komore) početak rada Skupštine odlaže se za jedan (1) sat. Nakon toga Skupština može otpočeti sa radom i donositi pravno valjane odluke ako je prisutno najmanje 1/3 ukupnog broja članova Komore.

Član 4.

Kada predsjednik Komore ili osoba koja ga zamjenjuje utvrdi da se Skupština može održati i da ona može donositi pravno valjane odluke, pristupa se izboru tri (3) člana Radnog predsjedništva, zapisničara i dva ovjerivača zapisnika. Prijedlog za članove Radnog predsjedništva daje sazivač Skupštine, a može ga dati i svaki član Skupštine na samoj Skupštini.

Predsjednik Komore ili osoba koja ga zamjenjuje, ujedno je i predsjednik radnog predsjedništva.

Izborom članova Radnog predsjedništva, zapisničara i dva ovjerivača zapisnika rukovodi predsjednik Komore ili osoba koja ga zamjenjuje. Izbor se provodi javnim glasanjem većinom glasova prisutnih članova Skupštine.

U slučaju da postoji više prijedloga, izbor se provodi javnim glasanjem, za svakog predloženog kandidata zasebno, a izabrani su oni članovi koji su dobili najveći broj glasova

Član 5.

Predsjednik Komore, odnosno predsjednik Radnog predsjedništva rukovodi radom Skupštine, održava red, objavljuje rezultate glasanja i odluke Skupštine.

Tokom trajanja Skupštine, a posebno tokom donošenja odluka, Radno predsjedništvo vodi računa da Skupštini prisustvuje dovoljan broj članova kako bi donesene odluke bile pravno valjane, te može zatražiti da se ponovno utvrdi broj prisutnih članova Skupštine.

Član 6.

Ako Radno predsjedništvo iz bilo kojeg razloga nije u mogućnosti obavljati svoju dužnost do zaključenja Skupštine, Skupština može opozvati njegov izbor, te izabrati drugo Radno predsjedništvo.

RAD SKUPŠTINE

Član 7.

Radno predsjedništvo predlaže Skupštini na usvajanje prijedlog dnevnog reda koji je objavljen u pozivu za Skupštinu, sa eventualnim prijedlozima dopuna i izmjena. Daljnji rad Skupštine odvija se prema usvojenom dnevnom redu.

Skupština će raspravljati samo o onim prijedlozima dopuna i izmjena dnevnog reda koji su

pisanim putem sa obrazloženjem dostavljeni Komori, najmanje pet (5) dana prije održavanja Skupštine.

Radno predsjedništvo će iznimno staviti na glasanje prijedlog izmjena i dopuna dnevnog reda koje predloži Upravni odbor Komore ili pismeni prijedlog izmjena i dopuna dnevnog reda koje predloži najmanje 30 prisutnih članova Skupštine, najkasnije neposredno prije usvajanja dnevnog reda.

O usvajanju prijedloga dnevnog reda, odlučuje Skupština javnim glasanjem većinom glasova prisutnih članova.

Član 8.

Radom Skupštine rukovodi predsjednik Radnog predsjedništva prema dnevnom redu koji je usvojila Skupština.

Član 9.

Predsjednik Radnog predsjedništva daje riječ članovima Skupštine, po redu kojim su se prijavili za raspravu.

Član Skupštine, koji dobije riječ, može o svakoj tački dnevnog reda raspravljati samo jednom.

Iznimno, predsjednik Radnog predsjedništva može dozvoliti članu skupštine da raspravlja u više navrata o istoj tački dnevnog reda.

Član 10.

Svaki član Skupštine u svom izlaganju dužan je biti jasan, sažet i kratak, s tim da će ga u protivnom predsjednik Radnog predsjedništva opomenuti i ograničiti vrijeme izlaganja na pet (5) minuta, a ako uprkos tome nastavi izlagati na isti način, oduzeti mu riječ.

Član 11.

Ukoliko član Skupštine svojim istupima ometa rad Skupštine, Skupština može odlučiti većinom glasova prisutnih članova da ga se udalji sa Skupštine.

Član 12.

Niko nema pravo, osim predsjednika Radnog predsjedništva, i to u slučajevima iz člana 10. i 11. ovog Poslovnika, člana Skupštine, za vrijeme izlaganja, prekidati, upadati mu u riječ, na drugi način ga ometati ili uticati na slobodno izlaganje.

Član 13.

Rasprava u pravilu traje sve dok svi članovi Skupštine, koji sudjeluju u raspravi ne dovrše svoja izlaganja.

Član 14.

Poslije završene rasprave o pojedinim tačkama dnevnog reda ili o nekoliko spojenih tačaka dnevnog reda, predsjednik Radnog predsjedništva određuje glasanje o datim prijedlozima.

U slučaju više prijedloga o istom pitanju, glasanje o svakom prijedlogu se vrši redosljedom po kojem su oni predloženi.

Član 15.

Skupština donosi odluke javnim i tajnim glasanjem.

Javno glasanje provodi se dizanjem ruku «ZA» prijedlog, «PROTIV» prijedloga i «SUZDRŽAN».

Prijedlog se smatra usvojenim kada «ZA» prijedlog glasa više od ½ prisutnih članova Skupštine.

Član 16

Pored slučajeva kada je ovim Poslovnikom predviđeno tajno glasanje, Skupština može odlučiti da se i o drugim tačkama dnevnog reda provede tajno glasanje.

Izbori za članove organa Komore i delegate u Advokatskoj komori FBiH provode se tajnim glasanjem.

Član 17.

Kad je o pojedinoj tački dnevnog reda donesena odluka, o njoj se više ne može raspravljati.

Izuzetno, ako se tokom rada Skupštine utvrdi da je o pojedinoj tački dnevnog reda donesena pogrešna ili nepotpuna odluka, Skupština može većinom glasova odlučiti da se ta tačka stavi ponovno na dnevni red i provede nova rasprava radi donošenja nove odluke.

Član 18.

Rad Skupštine traje dok se ne podnesu svi izvještaji, dovrše sve rasprave i donesu odluke o svim tačkama dnevnog reda.

Skupštinu zaključuje predsjednik Radnog predsjedništva.

IZBOR I OPOZIV ORGANA KOMORE I DELEGATA

Član 19.

Skupština bira organe Komore na mandatno razdoblje kako je predviđeno Statutom Komore.

Svaki član Komore ima pravo da učestvuje u predlaganju i izboru kandidata za organe Komore i delegate.

Svaki član Komore ima pravo da bude kandidovan i biran na dužnosti u organima Komore i za delegate, pod uvjetima utvrđenim Zakonom o advokaturi, Statutom i ovim poslovnikom.

Prilikom kandidovanja i izbora članova za organe Komore i delegate poštovat će se principi jednakopravnosti, odgovarajuće nacionalne zastupljenosti i ravnopravnosti spolova.

Niko ne može obavljati istovremeno dužnost u dva ili više organa Komore, osim u slučajevima koji su izričito utvrđeni Statutom.

Član 20.

U slučajevima kada Skupština bira nove organe Komore i delegate za Advokatsku komoru FBiH (izborna Skupština), provodi se kandidacioni postupak, tokom kojeg se mogu predlagati i isticati kandidati za predsjednika Komore, ostale organe Komore koje bira Skupština, te delegate za Advokatsku komoru FBiH.

Kandidacioni postupak započinje četrdeset (40) dana, a završava se deset (10) dana prije održavanja izborne Skupštine.

Kandidacioni postupak provodi Kandidaciona komisija Komore, koju čine predsjednik i dva člana Komisije, a koje imenuje Upravni odbor najmanje šezdeset (60) dana prije održavanja izborne Skupštine. Predsjednik i član Kandidacione komisije ne mogu biti kandidovani za organe Komore. Mandat Kandidacione komisije ističe završetkom rada izborne Skupštine.

Kandidaciona komisija dužna je o održavanju izborne Skupštine, početku i trajanju kandidacionog postupka, dopisom blagovremeno, obavijestiti sve članove Komore, zajedno sa uputstvom o pravima i načinu predlaganja kandidata u skladu s odredbama ovog poslovnika.

Član 21.

Svaki član Komore ima pravo da bude kandidovan i biran za organe Komore ako:

- nije krivično kažnjavao za djela iz čl. 18. st. 1. tač. 5. Zakona o advokaturi;
- nije disciplinski kažnjavao za djela učinjena u vezi sa vršenjem advokatske djelatnosti;
- nema neizmirenih dugovanja na ime članarine ili drugih materijalnih obaveza prema Komori, u vrijeme kandidovanja i izbora;
- ispunjava posebne uvjete predviđene za kandidovanje i izbor za određene dužnosti u organima Komore i delegate u Skupštini Federalne advokatske komore.

Član 22.

Za predsjednika i potpredsjednike Komore mogu biti predloženi i birani kandidati koji najmanje deset (10) godina obavljaju advokatsku djelatnost i ispunjavaju uvjete iz člana 21. ovog poslovnika. Ista osoba ne može biti dva puta uzastopno predložena i birana za predsjednika Komore.

Za člana Upravnog odbora Komore može biti predložen i biran kandidat koji: najmanje pet (5) godina obavlja advokatsku djelatnost, u vrijeme izbora nije stariji od 65 godina i ispunjava uvjete iz člana 21. ovog poslovnika.

Za delegata u Skupštinu Federalne advokatske komore može biti predložen i biran svaki član Komore koji najmanje pet (5) godina obavlja advokatsku djelatnost i ispunjava uvjete iz člana 21. ovog poslovnika.

Za disciplinskog tužioca i zamjenike disciplinskog tužioca, disciplinske sudije i predsjednika i članove Nadzornog odbora Komore može biti predložen i biran član Komore koji ispunjava uvjete iz člana 21. ovog poslovnika.

Ukoliko Kandidacionoj komisiji u propisanom roku ne bude dostavljen dovoljan broj prijedloga kandidata koji ispunjavaju uvjete za kandidovanje i izbor u organe Komore i za delegate, ili ako postupku kandidovanja nisu poštovani principi iz čl. 19. st. 4. ovog poslovnika, Upravni odbor Komore je ovlašten da sačini ili dopuni kandidacijske liste, u skladu sa uvjetima utvrđenim ovim poslovníkom.

Član 23.

Od svih članova Komore koji su kandidovani na način utvrđen u članu 22. ovog poslovnika, Kandidaciona komisija će zatražiti pismenu izjavu o prihvatanju kandidature. Kandidat može prihvatiti kandidaturu samo za jednu funkciju u organima komore.

Kandidaciona komisija je ovlaštena da uvidom u evidencije Komore utvrdi da li kandidati ispunjavaju uvjete utvrđene ovim poslovníkom, a po potrebi određene podatke može zatražiti i od kandidata.

Na temelju primljenih prijedloga, Kandidaciona komisija utvrđuje prijedlog liste kandidata za svaki organ Komore i delegata za Skupštinu Federalne advokatske komore.

Kandidaciona komisija je obavezna uvrstiti na kandidatsku listu sve predložene kandidate koji su dali izjavu o prihvatanju kandidature i koji ispunjavaju uvjete iz člana 21. i 22. ovog poslovnika.

Član 24.

O prijedlozima kandidata koji su dali izjavu o prihvatanju kandidature ali nisu uvršteni na kandidatsku listu jer ne ispunjavaju uvjete iz čl. 21. i 22. ovog poslovnika, Kandidaciona komisija će Skupštini podnijeti poseban izvještaj.

Kandidati se na kandidatsku listu uvrštavaju abecednim redom.

Prijedloge kandidacionih lista za organe Komore i delegate Upravni odbor je dužan dostaviti svim članovima Komore najmanje sedam (7) dana prije održavanja izborne Skupštine.

Član 25.

Svaki član Komore može, najkasnije tri (3) dana prije održavanja izborne Skupštine, dati pismene primjedbe koje se odnose na ispunjavanje propisanih uvjeta za pojedine kandidate predložene na kandidatskim listama.

O datim primjedbama Kandidaciona komisija će na izbornoj Skupštini dati svoje izjašnjenje.

Član 26.

Skupština Komore može odlučiti da se kandidatske liste koje je predložila kandidaciona komisija izmijene i dopune tako što će na kandidatsku listu biti uvršten kandidat koji je u prethodnom postupku bio predložen, ali po ocjeni Kandidacione komisije nije ispunjavao propisane uvjete, ili da se sa kandidatske liste briše kandidat ako Skupština ocijeni da su osnovane primjedbe date na način utvrđenu članu 26. ovog poslovnika.

O potvrđivanju kandidatskih lista Skupština odlučuje većinom glasova. Glasanje je javno.

Na osnovu potvrđenih kandidatskih lista sačinjavaju se glasački listići radi provođenja postupka tajnog glasanja.

Član 27.

Glasanje o predloženim kandidatima provodi i nadzire Izborna komisija koja se sastoji od najmanje pet (5) članova i bira se na Izbornoj Skupštini javnim glasanjem.

Kandidate za članove Izborne komisije može predložiti svaki član Skupštine. Ako postoji više prijedloga od predviđenog broja članova komisije, za svakog kandidata glasa se posebno.

Članovi Izborne komisije ne mogu biti osobe koje su Komori dostavile pismenu izjavu kojom prihvataju kandidaturu u organe Komore za koje se vrši izbor.

Izabranim članom Izborne komisije, smatraju se oni članovi koji su dobili više od ½ glasova prisutnih članova Skupštine, a u slučaju podjednakog broja glasova, prednost ima stariji član Komisije.

Član 28.

Članovi Izborne komisije biraju između sebe predsjednika koji rukovodi radom Komisije i o rezultatima glasanja podnosi izvještaj Skupštini.

Član 29.

Izborna komisija dijeli glasačke listiće. Svaki prisutni član Skupštine dobiva po jedan glasački listić sa listom kandidata za svaki pojedini organ Komore koji se bira.

Nakon što je glasanje završeno izborna komisija utvrđuje rezultate izbora i o tome podnosi izvještaj Skupštini.

Član 30.

Glasanje se provodi na način tako što se zaokruži redni broj ispred imena kandidata na listi i to najviše onoliko kandidata koliko ih se bira u pojedine organe Komore za koja su kandidovani. Glasački listić mora sadržavati napomenu koliko se kandidata zaokružuje za svaki organ, odnosno za delegate u Advokatskoj komori FBiH.

Član 31.

Ukoliko je na glasačkom listiću zaokruženo više kandidata nego što ih se bira u pojedini organ Komore ili za delegate, glasački listić se smatra nevažećim. Ukoliko je zaokružen manji broj kandidata od potrebnog, glasački listić se smatra važećim. Prazni ili prekriveni glasački listići neće se uzimati u obzir.

Član 32

Prilikom izbora za Predsjednika Komore izabranim se smatra kandidat koji je u prvom krugu glasanja dobio natpolovičnu većinu glasova prisutnih članova Komore sa pravom glasa.

Ukoliko u prvom krugu glasanja nijedan od kandidata ne dobije natpolovičnu većinu glasova prisutnih članova komore sa pravom glasa, provešće se drugi krug glasanja u kojem se bira između dva kandidata koji su dobili najviše glasova u prvom krugu glasanja.

Ako se na drugom mjestu po broju glasova nalaze dva ili više kandidata koji su dobili jednak broj glasova, za takve kandidate provešće se posebno tajno glasanje tako da će u drugi krug glasanja biti uvršten onaj kandidat koji dobije najveći broj glasova.

Izabranim se smatra onaj kandidat koji dobije većinu glasova prisutnih članova Komore sa pravom glasa.

Kandidati koji se u postupku za izbor predsjednika Komore nalaze na drugom i trećem mjestu po broju glasova, smatraju se izabranim za potpredsjednike komore.

Član 33.

Prilikom izbora za članove Upravnog odbora izabranim se smatra deset (10) kandidata koji su dobili najveći broj glasova.

Ukoliko u postupku izbora za članove Upravnog odbora kandidati imaju jednak broj glasova, shodno će se primjenjivati odredbe člana 32. st. 3. ovog poslovnika.

Član 34.

U postupku izbora za delegate u Skupštini Advokatske komore FBiH, svaki član regionalne komore koji učestvuje u glasanju ima pravo glasati za sedam (7) kandidata od ukupnog broja kandidata koji se nalaze na glasačkom listiću.

Za Skupštine Advokatske komore FBiH izabranim će se smatrati 34 kandidata koja su dobila najveći broj glasova. U slučaju da dva ili više kandidata imaju jednak broj glasova, a ne mogu biti svi izabrani, ponovo će se glasati kao bi se između njih izabrao potreban broj nedostajućih delegata, s tim što svaki član skupštine glasa samo za jednog kandidata. Ukoliko nakon prvog kruga glasanja, glasovi budu raspoređeni tako da glasove dobije manje od 34 kandidata ponoviće se glasanje kako bi se između kandidata koji nisu izabrani u prvom krugu, izabrao nedostajući broj kandidata, s tim što svaki član skupštine glasa samo za jednog kandidata.

Ukoliko u postupku izbora za Skupštinu Advokatske komore FBiH kandidati imaju jednak broj glasova, shodno će se primjenjivati odredbe člana 32. st. 3. ovog poslovnika.

Član 35.

U postupku izbora za ostale organe Komore shodno će se primjenjivati odredbe člana 33. ovog poslovnika.

Član 36.

Nakon što je glasanje završeno i utvrđeni rezultati izbora, predsjednik Izborne komisije podnosi izvještaj Skupštini i proglašava rezultate izbora.

Član 37.

O radu izborne komisije vodi se zapisnik koji sadrži: datum, ime predsjednika i članova Komisije, ukupan broj glasačkih listića koji su podijeljeni i onih koji su pronađeni u glasačkoj kutiji, broj važećih i nevažećih listića, broj glasova za svakog pojedinog kandidata te popis izabranih kandidata s dužnostima na koje su izabrani.

Zapisnik potpisuju svi članovi Izborne komisije.

Imena i dužnosti izabranih kandidata unose se u zapisnik Skupštine.

Glasački listići, zapisnik, kao i sav izborni materijal zatvara se i pečati u posebnoj omotnici i pohranjuje u arhiv Komore.

Član 38.

U slučaju kada se provode dopunski izbori za popunu mjesta člana organa Komore koje je ostalo upražnjeno, neće se provoditi kandidacioni postupak već prijedlog kandidata utvrđuje Upravni odbor Komore.

Odredbe st. 1. ovog člana ne primjenjuju se u slučaju da je potrebno provesti izbor predsjednika Komore prije isteka mandata.

Član 39.

Skupština rješava o ostavkama članova u organima Komore prije isteka mandata. Ostavka se smatra prihvaćenom ako je za nju glasalo više od polovine prisutnih članova Skupštine. Glasanje o prihvatanju ostavke je javno.

Skupština ima pravo razriješiti dužnosti, odnosno opozvati, pojedine članove organa koje bira i prije isteka mandata. Zahtjev za razrješenje može podnijeti svaki član koji svoj pismeni i obrazloženi prijedlog dostavi Upravnom odboru Komore i koji je potpisan od strane najmanje 1/3 članova Komore.

O ostalim slučajevima, o prijedlogu odnosno o zahtjevu za opoziv, odlučuje se ukoliko je takav prijedlog usvojen kao tačka dnevnog reda.

O opozivu člana organa Komore Skupština odlučuje tajnim glasanjem. Odluka o opozivu smatra se usvojenom ako je za nju glasala većina prisutnih članova Skupštine.

ZAVRSNE ODREDBE

Član 40.

Tok rada Skupštine može se snimati audiovizuelnim sredstvima. Odluku o tome donosi Skupština. Na osnovu tonskog snimka sačinjava se zapisnik koji potpisuje predsjednik Komore odnosno predsjednik Radnog predsjedništva, zapisničar i dva ovjerivača zapisnika.

Zapisnik sa svim priložima, kao što su pisani prijedlozi, primjedbe i slično, pohranjuje se u arhivu Komore.

Član 41.

Ovaj Poslovnik stupa na snagu danom usvajanja na Skupštini.

Stupanjem na snagu ovog Poslovnika prestaje važiti Poslovnik o radu Skupštine Regionalne advokatske komore Sarajevo od 01.09.2003. godine.

SKUPŠTINA
REGIONALNE ADVOKATSKE KOMORE
SARAJEVO